



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*vanè discutienda in Scholis Medicorum, die Jovis nono
mensis Januarii, anno Domini M. DCC. LXXII.*

M. LUDOVICO-ALEXANDRO GERVAISE,
Doctore Medico, Præside.

*An variolarum inflammatio ab omnibus aliis diversa, quod sit inflammatio-crisis,
ac proinde semper fovenda & ad suppurationem perducenda?*

I.



UO præcipua in variolis tempora distingui omnibus Medicis notum est: alterum ebullitionis quod tribus aut quatuor diebus includitur, & in quo febris adest acutior aut remissior: alterum eruptionis, quod ad decem aut ad decem & sex extenditur dies, & in quo febre, aut penitus cessante, aut saltem valdè imminutâ, papulæ morsum pulicarium non absimiles ad corporis ambitum, præsertim ad faciem, ad thoracem, & ad extremitates tam superiores quam inferiores efflorescunt, quæ indefinenter crescendo, donec suum fastigium attigerint, in totidem tubercula immutantur

A

Vocabulum
CRISIS longe aliâ
acceptione inter
Medicos sumitur
quam apud vul-
gus. Apud Medi-
cos significat sem-
per evacuationes
salutares quoquo
modo & quaquâ
viã hant; & hæc
evacuationes op-
positæ sunt eva-
cuationibus sym-
ptomaticis quæ
semper noxiæ
sunt: apud vul-
gus verò crisis
habetur pro ang-
mento agitatio-
nis & quâdam tu-
mulus specie.

intense rubentia, calentia, dolentia, in verum pus & in veros abscessus abeuntia. Hi abscessus pure exsiccatò duris & crassioribus crustis obducuntur, paucis post diebus facile & quasi spontè decidentibus.

Hunc morbum Medici, ab illo tempore quo primum ab Rhaze Medico Arabe observatus est & accuratè descriptus, ad hodiernum usque tempus, uno ore omnes inflammatorum appellaverunt, methodumque inflammationi communi idoneam hinc adhibendam suaserunt. Sed si hujusce inflammationis speciem accuratius distinxissent, sique magis ad finientis quam ad incipientis morbi phœnomena respexissent, à tam latâ definitione tradendâ abstinuissent, neque, tam generalem curandi methodum instituissent. Cum enim hic morbus constanti, absolutè necessariâ, & inevitabili naturæ lege nunquam nisi plenâ suppuratione in sanitatem vertatur, eos haud fugere potuisset, variolarum inflammationem ab omnibus aliis esse diversam, quòd sit *inflammatio-crisis* quæ semper fovenda, sustinenda & ad suppurationem perducenda, & quòd cæteræ inflammationes sint essentielles aut symptomaticæ, quæ semper retundendæ, à suppuratione deffendendæ & ad resolutionem perducendæ. Ut vero hæc diversitas apertior fiat & plenius eluceat, inflammatio communis seu generatim sumpta variolarum inflammationi est comparanda, & utriusque phœnomena tam quoad progrediendi modum, quam quoad varios exitus, & diversam curandi rationem attentè sunt examinanda.

I I.

INFLAMMATIO in genere nihil aliud est quam sanguis arteriosus ruber ad extremos vasorum apices retentus & collectus, aut per auctam circulationem in principia arteriarum lymphaticarum fortiter impulsus, ibique infarctum efformans, qui continuam pressionem, continuumque attritum patitur ex reliquo sanguine à tergo semper apellente. Ex hoc infarctu tumor nascitur major aut minor prout majorem aut minorem vasorum quantitatem occupat.

Nunquam paulò validior in corpore nascitur inflammatio, siue interna sit, siue externa, quin febris statim accendatur. Hinc in essentialem & in symptomaticam inflammatio potest distingui: essentialem rectè appellaveris quæ febrem prægreditur, symptomaticam verò quæ post natam febrem exoritur, ut & quæ vulnibus, fracturis & variis luxationibus supervenit, siue febrem in sodalitiū accerferit, siue non accerferit. Sed hæc accurata distinctio neque semper possibilis, quia sæpè febris & inflammatio, uno & eodem impetu simul irruunt, neque absolutè necessaria, quia non hinc diversa exurgit curandi ratio, nisi quòd fortè promptiora & efficaciora requirantur auxilia. Ut ut sit, febris & inflammatio sibi mutuas vires suppeditant, quæque proportionè hæc increfcit aut minuitur, eadem etiam illa augetur aut decrefcit, & neutra, quoties evasurus æger, non nisi paulatim extinguitur.

Proximam inflammationis causam agnoscunt Medici vel nimiam sanguinis spissitudinem, vel nimiam vasorum coarctationem, vel simul utramque, & quælibet inflammatio alterutro ex his quatuor exitibus semper terminatur, vel resolutione, vel suppuratione, vel gangræna, vel scirrho.

In resolutione crassus & stagnans cruor paulatim attenuatur, diluitur, & consuetas circulationis vias replegit, vasa quæ erant infarcta deplentur, laxantur, & pars inflammata perfectè sanatur, nullo, ne tantillo quidem progressu læsionis vestigio remanente.

Suppuratio obstruentem materiam, ipsosque vasorum parietes in liquamen quoddam cremori-forme invertit, quod pus appellatur.

Gangræna est humoris infarcti, ipsorumque vasorum absoluta corruptio, quæ pars inflammata calore & motu vitali orbatur & cadaverosæ ac putrescentis carnis speciem induit.

In ticcirho denique obstruens materies, diffatis per calorem tenuioribus & aqueis particulis, simulque crassioribus relictis, in duritiem quasi lapideam compingitur, partis organicæ usu penitus pereunte.

Ex hisce quatuor exitibus sola felix optandaque est resolutio, ut quæ sola sanitatem restituat. Tres alii exitus, aut sunt morbi ipsâ inflammatione periculosiores, aut sunt certi mortis mox venturæ prænuncii. Nonne reverà in pleuritide, in peripneumoniâ, in ventriculi, aut alterius cujuslibet visceris inflammatione multò majore periculo laborat æger cujus inflammatio in suppurationem, aut in gangrænam veria est, quam inflammatione adhuc crudâ? Tota itaque curantis industria eò dirigenda ut suppuratio aliique infausi avertantur exitus & ut perfecta obtineatur resolutio. Hinc quidquid accensum calorem extinguit, sanguinem sicciorum & crassiorum humectat & diluit, vasaque nimis tensa & repleta vaquat & relaxat, in usum est trahendum. Hos scopos Medici sequentibus præcipue auxiliis assequuntur.

1°. Sanguis pluries, propter, & quandoque fere ad animi deliquium usque est mittendus, præsertim in juvenibus & in viris temperamento sanguinico & æstuoso præditis: sic minuitur plethora, levius fit pondus totius massæ sanguinis, in oppositum obicem arietantis, & vasis sua redditur potestas in liquida contenta agendi, eaque attenuandi & ulterius propellendi.

2°. Imperandi potus aqueosi, refrigerantes, resolventes & leviter nitrati, ut quod concretum est diluatur, dissolvatur, fluxilius reddatur. Talia sunt serum lactis aut simplex, aut plantis refrigerantibus incoctis medicatum; decocta ex radicibus acetosæ, fragariæ, liquiritiæ & graminis cum plantis capillaribus, borragine, chærefolio, floribus violarum, rosarum & similibus; decoctum hordei modicè saccharatum & nitratum; emulsiones dilutiores ex seminibus refrigerantibus cum paucis saccharo, succis aurantium aut limonum vel grossulariæ ad gratam aciditatem in aqua dilutus & saccharo edulcoratus.

3°. Singulis diebus bis aut ter alvus clysteribus emollientibus & refrigerantibus est subluenda.

4°. Ipsi partibus inflammatis, aut inflammationi proximis applicandi foci ex decocto plantarum emollientium & resolventium, aut similibus decoctorum vapores ad has partes dirigendi, & pluries repetendi.

5°. Utendum victu tenuissimo, nihilque ægroto concedendum præter iuscula valde tenuia ex carne vitulinâ, aut puli gallinæ quoad majorem partem conflata, paucis nitro addito nec non foliis acetosæ & chærefolii, quæ iuscula ad cyathum aut semi-cyathum singulis trihoris sunt exhibenda.

6°. Angue pejus fugienda quæcumque motum sanguinis intendere, majoremque in eo æstum accendere apta sunt, ut potiones cardiacæ ex aquis aromaticis & calidis, spiritibus ardentibus, salibus oleoso-volatilibus, confectioibus calidis & similibus conflatæ, nec non vinum merum, tam simplex, quam id in quo aromatata ut cinnamomum, nux moschata, zinziber, piper, crocus & similia cum saccharo ebullierint.

Sed quantacumque sit horumce auxiliorum efficacia, hanc longè superant va-

riæ evacuationes criticæ quas natura potens, aut hisce auxiliis adjuta, in ægotantium levamen non nunquam suscipit. Tales sunt biliosus alvi profluvium aut biliosus vomitus, aut etiam morbus regius debito tempore superveniens in pleuritide, in peripneumoniâ, in hepatitide inflammatorio-biliosis, larga sanguinis è naribus eruptio, sudores profusè erumpentes, copiosa & facilis sputorum exspitio, in iisdem morbis sincerè inflammatoriis quandoque etiam apostemata & bubones aliis in partibus longe distitis erumpentes. Hâc methodo, naturâ & arte sic amicè fœderatis & ad eandem metam properantibus, inflammationes quantumvis terrificæ & minaces à suppuratione, gangræna & scirrho deffenduntur & ad resolutionem perducuntur, sanitate in integrum redeunte.

I I I.

VARIOLARUM inflammatio primo quidem intuitu inflammationi communi prorsus similis videtur. Sed quanta inter utramque dissimilitudo! Adest quidem infarctus sanguineus ad extremos vasorum apices ut in inflammatione communi; adfunt communia inflammationis symptomata dolor, calor, tumor, rubor; sed ultrâ sanguinis infarctum, ultrâ inflammationis symptomata, adest peculiare quid venenatum, vi tam coagulatoriâ pollens ut se numquam resolvi patiatur, ut nullâ aliâ ratione quam suppuratione extra corpus possit eliminari. Febris aliarum inflammationum individua est comes, quòque magis hæ intenduntur, eò etiam intensior illa redditur. In variolis vix prima emicant papularum vestigia, cum febris statim mitescit, & quo plenius turgent, eò fit hebetior; in aliis inflammationibus tota curantis industria in eo occupanda ut præcaveatur suppuratio, in variolis è contrâ, ut promoveatur. Si inflammationibus aliis succedat suppuratio, en morbus priori longè periculosior: in variolis, si nulla, aut si imperfecta fiat, quot horrenda & ægrè superabilia se se efferunt symptomata! quàm imminens mortis periculum! aliæ inflammationes, vel gravissimæ, quotidie perfectè resolvuntur; variolarum pustulæ, vel tantillæ, resolutionem nesciunt.

Non minus oppositas inter utrumque morbum differentias exhibet curatoria methodus. Largæ & repetitæ venæ sectiones in aliis inflammationibus tan abolutæ sunt necessitatis, ut absque venæ sectionibus sanationis spes prorsus abjicienda: in variolis ut plurimum necessariae non sunt, & sæpe sunt noxiæ; in inflammationibus medicamenta refrigerantia, aquosa & diluentia sola sunt extendenda, in variolis ut plurimum fugienda; remedia æstum foventia nocent in inflammationibus, in variolis necessaria sunt & salutaria; victus tenuis & exquisitus in inflammationibus absolutè necessarius, in variolis victus paulò plenior est concedendus, & pustulis perfectè egressis, sæpe ægotantes sunt voraciores quàm sanitate in ipsâ; in inflammationibus denique prodest debito tempore alvum fluidam fieri, sanguinem è naribus erumpere, sudores profusos oboriri; hæ omnes evacuationes in variolis sunt pessimæ, & si non tempestivè coerceantur ægotantium desperata salus. Uno verbo, quod inflammationibus proficuum, variolis semper adversum, saltem generatim sumptum.

I V.

QUANTUAM variolarum inflammationem sustinendam & ad suppurationem perducendam præcipiamus, procul absit ut à primo morbi insultu, ad ultimum usque diem, & omnino delapsas pustularum crustulas, remedia æstum augentia præscribenda, oleumque igni affundendum suadere in animo habeamus. Cum in variolis sua distincta sint tempora, sua cuique tempori methodus ac-

commodanda, ac quemadmodum in tempore ebullitionis, cui regimen temperans opportunum est, fugienda sunt nimis refrigerantia. & fortius evacuantia, sic in tempore eruptionis, cui æstum foventia conducunt, ab incendiariis & calidioribus medicamentis cautè abstinendum, nunquamque magis, quam in utroque huiusce morbi tempore, locum obtinuit hoc monitum: *inter utrumque tene, medio existimus ibis.*

Primo illo tempore quod ebullitionis appellatur, statim atque contagii variorum subtilior halitus, & quasi spiritus rector ad sanguinis massam illapsus est, febris accenditur mitior aut ardentior, & symptomata ingruunt mitiora aut sæviora, prout erupturæ mox variolæ è discretarum, vel è confluentium genere sunt futuræ. Non tamen tam certa tamque constans hæc est differentia symptomatum variolas discretas aut confluentes præcedentium, quin vel in ipsis discretis terrificæ quandoque exurgant symptomata. Hæc febris, sive cum mitiorum, sive cum sæviorum symptomatum satellitio incedat, est semper molimen criticum, seu naturæ opus in quo omnes corporis potentie & facultates, viribus simul unitis, afflatum sanguini contagium ex ipsius sinu excutere, & ad cutem ceu ad corporis corticem expellere allaborant: uno verbo est vera crisis, veræ morbi judicatio, nullamque unquam febrem agnovit sedula crismus observatrix antiquitas, cui sua crisis tam certa tamque regularis fuerit; nam semper accidit, & ferè semper eodem tempore; vixque vel levissima macularum ad cutem efflorescentium vestigia, venenum jam è sanguine segregari incipiens, proximumque eius ad cutem adventum prænunciant, cum statim febrilis ille ardor deservescit, omnisque ille symptomatum ferocium tumultus subsidit. Quodnam vero in hoc casu calcandum iter apprimè docet Hippocrates Aphorismo vigesimo sectionis primæ: *quæ judicantur, inquit, aut judicata sunt perfectè, neque noveto, neque in novato sive medicamentis purgantibus, sive aliis irritamentis, sed finito.*

Huiusce Aphorismi veritatem & usum in variolis ratio demonstrat & experientia confirmat. Suscepti revera contagii extra sanguinem expulsio non potest fieri absque febre, seu absque præternaturali quodam motus circulatorii & caloris incremento, & absque quodam variorum symptomatum concursu. Si enim ultra consuetum gradum motus circulationis & calor corporis non intenderentur, vis deficeret ut impressum sanguini contagium evolveretur, & per sanguineos fluctus ad ambitum deferri posset. Symptomata verò quæ ante pustularum eruptionem superveniunt, ut vomitus, sanguinis eruptiones & alvi fluxus, si non ipsæmet contagium expellunt, sunt tamen pars conaminis naturæ, cujus ope humores superfluos, & qui ipsi deinceps oneri essent, providè eliminat, ut ipsum postea contagium facilius subigat, subactumque penitus abigat. Non itaque hæc febre, hisque symptomatibus adeo terri fieri oportet, nam etsi gravia, necessaria tamen sunt & ut plurimum innocua, eò magis quod ferè semper intra quartum aut quintum diem sunt quietura. Tunc vere judicatur morbus, nihilque movendum aut innovandum, nisi adeò fera sint symptomata ut imminens vitæ periculum impendat, hocque ipso in casu non nisi parè & cautè admodum: nam si Medicus repetitis venæ-sectionibus pethoram minuerè, crebris clysterum injectionibus alvi feces eluere, validioribus emeticis ventriculum abstergere, largo refrigerantium potu calorem extinguere aggreditur, omnia tulque deque miscet, naturæ molimen turbat & impedit, ipseque periculum accersit quod conatur avertere.

Quod ratio dicat, confirmat experientia. Longè frequentius in divitibus &

populis urbibus exitiales sunt, variolæ quam inter ruri degentes. Quanam huius differentia cuncta? Non alia certe est quam prorsus opposita curationis ratio. Cum quis inter rusticanos febre laborat, quam sequutura est variolarum eruptio, sive sit jam adultus, sive nondum pueritia aut juveniles annos supergressus, quamvis febris sit valde intensa, quamvis gravia sæviant symptomata, ut nausæ, vomitus, sanguinis profusiones, alvi fluxus & alia, non statim lecto addicitur; sive quod rustici naturaliter sunt lecti impatientes, sive quod in hoc morbo, ipsa natura ægrotos à decubitu in lecto aversos reddit, toto illo tempore rustici libero aëri expositi remanent, etsi sæpe frigidissimo. Si tanta est symptomatum gravitas, & præsertim lassitudinis, & prostrationis sensus, ut paulò majori quiete sibi opus esse sentiant, se quidem in lectum projiciunt, sed consuetis vestibus non exutos, extra lintea decumbunt; ibi non remorantur nisi quantum necessum est ut lassitudinem & prostrationem aliquantulum sublevent, & lectum deserunt statim atque incipit incallescere, nam lecti calor symptomatum ferociam adauget, præsertim vomitum & sanguinis eruptiones. Non aliis potibus utuntur quam pomaceo aut cerevisia, multà aquâ dilutis, aut lacte ebutirato cum aquâ permixto. Nonnunquam feri lactus è caelo molli recens effluxi haustus aliquot assument. Sic ebullitionis tempus transigunt, nec se plerique aëri libero subducunt & in lectum recipiunt antequam jam pienè terminata sit pustularum eruptio, ipsaque pustulæ augeri & inflammari incipiunt; tuncque calide in lecto se continent & identidem vinum cum saccharo mixtum hauriunt.

Hæc rusticanorum simplex agendi ratio duo ipsi commoda affert. 1°. Frigore aëris ambientis nimiam sanguinis ebullitionem coercendo, vim symptomatum infringit & impedit ne præ nimio æstu tota fere sanguinis massa in pustulas efforandas abripiatur. 2°. Morbi tam diu & tam sedè diuturnitatem & tedium valde imminuit.

Quantum diversa est urbanorum curatoria methodus! Vix quispiam agrotare incipit febre variolas producturâ, cum statim ab aëre communi arcetur, & in lecto molli & calido includitur; dumque hæc intempestivâ cautelâ æstus jam ex se nimius ulterius adhuc intenditur, aliunde non magis prudenti consilio sanguis repetitis venæ-sectionibus exhauritur ut tollatur plethora quæ semper, sed falsò, præsens animo fingitur, & ut præcaveatur inflammatio quæ tamen necessaria est & inevitabilis. Vescicatoria variis partibus apponuntur, spe malignitatem supposititiam educendi, & quæ, si verè extiterit, non aliter certius potest exhauriri quam perfectâ suppuratione; emetica & cathartica propinantur, dum ventriculus motu spontaneo insensam sibi saburram rejicit, & intestinis sese etiam sponte exonerantibus per largos alvi fluxus. Tandem post hæc venæ-sectiones, ut nimius calor retundatur, largus refrigerantium potus præscribitur. Sic ne impleta creditur hæc sacra Hippocratis lex: *quæ judicantur ne moveto, neque innovato sive medicamentis purgantibus, sive aliis irritamentis sed finito?* En vera causa cur in magnis urbibus variolæ longè periculosiores quam inter rurigenas? Quoties itaque Medicus in tempore ebullitionis ad ægotantem accessit, à tramite à rusticanis calcato & ab ipso Hippocrate monstrato, quantum fieri potest, nunquam recedat. Ne obliviscatur vix potentius remedium temperans in hoc casu posse præscribi quam pergere aëris communis frigori exponi; si nimia sit febris, si nimius æstus ex sanguinis redundantia ut in temperamentis verè sanguineis accidit, tum venam secare ne dubitet & sanguinem mittere, sed parè & solum quantum sufficit ut eruptioni promo-

vendæ faveat, non ut plethoram necessariam auferat; quinimo si symptomata magis ex sanguinis rarefcentiâ quam ex ejus redundantia oriantur, omisâ venæ-sectione, ut pote in hoc casu noxiâ, acido vitriolico in aquâ ad gratiam aciditatem diluto, hæc rarefcentia compescenda, exsolutaque sanguinis principia ad se invicem revocanda. Præsentibus saburæ indicii in ventriculo, aut cacoehylæ in intestinis, si vomitus superveniat, aut alvi fluxus, sibi sunt permittendi, si modum non excedant, quod magnam noxiorum humorum copiam subtrahant; si verò excedant, aut tam diu persistant, ut humoribus plûs æquo effusis non jam relinquatur unde incrementum pustulæ, hæc evacuationes theriacâ, Diascordio, pulvere Pannonico & similibus coercentæ; si è contra non sufficient, lenioribus emeticis & subductoriis proritandæ ut aquâ tepidâ cum oleo permixtâ & assatim haustâ, vel sero lactis cui cassia incocta fuerit aut in quo mel rosaceum, aut violaceum fuerit dilutum. Nunquam, aut raro validioribus utendum, ne partibus internis valdè irritatis & præternaturaliter incalcescentibus vera & exquisita inducatur inflammatio.

Tempore eruptionis cum eò melius eant res ægrotantis, quò magis affurgunt & plenius turgent pustulæ, & quò plenior succedit pustulationis suppuration; cumque nullâ aliâ viâ quam suppuratione venenum ad cutem depositum omnino extra corpus possit extrudi, hæc eruptio est ipsissimum naturæ opus ac proinde semper fovendum, nam quò natura vergit, eò semper eundem, & ut inquit Hippocrates, Aphorif. 21. lect. 1. quæ educere oportet, quò maximè vergunt, eò ducenda per loca convenientia. Sed hæc eruptio non iis fovenda quæ ignem igni adjiciunt, quæ naturæ opus turbant, sed iis quæ motum & calorem necessarium sustinent. Is omnino servandus est modus quem in aliis evacuationibus criticis & salutaribus religiosè servandum præcipiunt Medici. Sic, verbi gratiâ, sudore critico in morbo inflammatorio tempestivè erumpente, cautus Medicus salutarem hunc sudorem sustinet, calore lecti, potu leni tepido & parçè sumpto, aëre cubiculi moderatè calido & similibus, neque hunc ultra modum augere nititur remediis caloris ignei, nec hunc rursus impedit frigore incautè admissò, venæ-sectione intempestivâ aut aquæ frigidæ potu: sic omnino agendum in fovendâ variolarum inflammatione, iis tantum additis quæ huic morbo peculiariter conducunt.

Post ebullitionem absolutam, pustulis eminere incipientibus, æger in lecto molli & calido retinendus, & levibus ac simul calidis stragulis contegendus ut à frigore defendatur & in calore naturali paulò superiore conservetur. Nunquam siparia lecto circumducantur, aërem enim putridis & foetidis halitibus refertum circâ ægrotantem retinent. Imo semel aut bis in die fenestris paulisper apertis in cubiculum exterior admittatur aër. Sic interior renovatur, vividior & respiratori opportuni redditur.

Potus sit leviter expellens & sudorificus, ut decoctum radicis scorfonæræ, cum floribus papaveris erratici, aut decoctum lentium cum paucò cinnamomo contracto & tantillo sacchari, aut similia.

Juscula sint magis nutritientia quam in aliis inflammationum speciebus, præsertim si adsit fames, & variolæ sint è discretarum genere.

Pulveres diaphoretici semel aut bis in die ad scrupulum unum, aut drachmam semissem exhibeantur, conflati ex absorbentibus & parcissimâ quantitate sulphuris aurati antimonii, cujus tota dosis in singulos dies granum fenni aut granum integrum non debet transcendere, sicque septem aut octo diebus pergatur. Hoc medi-

alimentum non alterum sibi par habet in hoc morbo ; id enim præ cæteris omnibus habet commodi quod efficacissimè & tamen pacatissimè à centro ad cutem propellat , nec æstum & calorem periculosè augeat ut pleræque potiones cardiacæ , & vinum , tam sincerum quam cum aromatibus & saccharo permixtum , adeoque vel in ipsâ febre pustulis imperfectè erumpentibus tutò exhiberi potest absque metu & periculo febris adaugendæ.

Si segnis progreditur eruptio , ob vires exhaustas & nimium languidas , potiones cardiacæ ex aquis aromaticis & spirituosus cum antimonio diaphoretico , pulvere viperarum , croci austriaci granis aliquot & saccharo compositæ , vel vinum sincerum calidum cum paucò saccharo exhibeantur.

Tenuis & exquisitior diætâ non nisi ægotantibus quorum vires per morbi violentiam nimium oppressæ opportuna est. Imo hujus modi ægotantes nutriendi quidquid abhorrent & respuunt , solamque ptisanam si grata fuerit aut cochlearia aliquot potiones cardiacæ grati etiam saporis in omne alimentum admittunt donec ex hoc misero statu paululum emerferint.

Sed pustulis probè egressis si importuna fames cruciet ægotantes , fugienda tenuis & exquisitior diætâ victusque paulò plenior concedendus , non qui tamem expleat , sed qui ipsam retundat & temperet : *non fames , non satietas , neque quicquam aliud quod naturæ modum excedat bonum inquit Hippocrates.* Aphoril. 4. sect. 1.

Felix curaticum imprudentia , quæ importunis ægotantium precibus victæ , ipsis quandoque victum pleniorè furtim concesserunt , multoties docuit hunc non his ægotantibus noxium , sed valdè utilem & absolutè necessarium esse , nam ægri , qui priùs fame exhausti miserè peribant , longè melius postea habuerunt , ipsis etiam valdè stupentibus medicis. Quid reverà tam tenui , tamque exquisitâ diætâ opus est in morbo cui certus quidam plethoræ gradus semper necessarius est ? Quis non sentit tam severam diætâ gravissimam & intolerabilem iis esse qui , eruptione plenè peractâ , integrâ ferè sanitate fruuntur , & qui fame eo acriori torquentur quod ipsorum corpus . tempore ebullitionis , per profusas evacuationes & omnimodam alimenti abstinentiam jam exhaustum est. Hæc inexhausta fames vires dejicit , pustularum maturationi officit , somnum arcet , anxietatem , debilitatem & ipsam mortem sæpè affert. Tristes hos scopulos effugissent Medici , si Hippocratis oracula minus oblivioni tradidissent. Ab ipse ore didicissent pleniorè in morbis victum concedendum cum remissiores sunt : *tantum à tenui victu recedendum , inquit Hippocrates , Aphor. 7. sect. 1. quântò morbus remissior extremis fuerit.* Nihil itaque incommodi , sed multum utilitatis potest exurgere ex paulò pleniori victu ægotantibus in variolis concessio : paulo plenior victus , si addit fera fames , omnium cardiacorum tutissimum & efficacissimum est.

Dum pustulæ variolosæ intensissimè inflammantur , tantus in toto corpore dolor diffunditur , præsertim si variolæ sint confluentes , ut immanem spirituum tumultum inferat , & somnum irrepere non sinat. Tantum dolorem obtundere oportet , nam febrem accersit. *Dum pus sit , inquit Hippocrates , dolores & febres accidunt magis quam confectio.* Aphor. 47. sect. 2. Syrupus de Meconio & variæ præparationes ex opio desumptæ hunc periculosum tumultum compescunt , si tempestivè & debitâ quantitate singulis diebus sub vespèram exhibeantur ; nam dolorem obtundendo somnum prius fugientem revocant & pustularum maturationem promoveant.

Hic locus est insurgendi in usum seu potius in abusum vesicatoriorum. Qui unquam factum est ut tam dira consuetudo admissa fuerit? Quid? In morbo cujus maxima sævities oritur ex dolore acutissimo per totum corpus diffuso in tempore quo pus fit, & in quo dolores & febres accidunt magis quam confecto, absque ullâ dubitatione, absque ullo poenitendi metu, vesicatoria, & quidem larga, modò alteri, modò utrique tibie apponuntur? Quonam ergò consilio? Nùm exhauriendæ malignitatis? Quænam alia malignitas in variolis quam pustularum acutè inflammatarum numerus, magnitudo & dolor acutissimus; & quænam aliâ viâ plenius exanthlari potest quam suppuratione? Nùm ut humoris variolosi portio per vesicatoriorum aperturam effluat? sed humor ille qui per lacera avulsæ cutis vascula effluit est mere serosus, non purulentus; imò si quid puris efflueret, metuendum esset ne, humore necessario subducto, pustularum deficeret eruptio, aliundè contagium variolarum nullâ aliâ portâ è corpore egreditur quam suppuratione; nùm caloris adaugendi? Sed in hoc casu jam plus caloris adest quam requiritur; &, in calidis affectibus, vesicatoriis uti nefas. En sapiens effatum Aërii de vesicatoriis: *In calidis & siccis affectibus vesicatoriis non utor, inquit, per vesicantium enim stimulus major in fluidis fermentatio, turgescientia & orgasmus excitantur, & in solidis vividior oscillatio.*

Vesicatoria ergò in variolis, generatim loquendo, nunquam conveniunt. Unus tantum casus excipiendus, quando nempe ob fractas & exhaustas vires per nimias & nimis repetitas antè eruptionem venæ sectiones, vel eruptio torpescit, vel pustulæ jam egressæ subdunt. & recedere videntur, nullo calore, & nullâ febre apparentibus, tunc natura deficiens ad se revocanda. In hoc casu vesicatoria felici cum successu possunt admoventi.

Sed, præter superius recensita vesicatoriorum damna, aliud adhuc vitium ipsis potest exprobrari. In variolis prosperè suum cursum absolventibus, urinæ quas ægrotantes reddunt paulò post mictum crassæ & turbidæ fiunt; sive ob inductum intestinis calorem, & alvum strictiorem redditam, sive ob partem veneni variolosi per urinas simul exeuntis; quidquid sit, hæ urinæ cum ægri levamine semper rejiciuntur. Si applicantur vesicatoria, urinæ non ampliùs post mictum turbidæ & crassæ fiunt; crassiores & noxiæ humorum partes non ampliùs per renes transcolantur, ob vim propriam & peculiarem quâ cantharides, ex quibus consulantur vesicatoria, in renes præsertim agunt, & ipsis erethismum quemdam inducunt. Hinc in sanguine remanet, aut in ipsis refluit crassa & cruda materies, quæ modò in hanc modò in illam partem irruit, postque morbum, varia affert incommoda, quibus diù adhuc ægri consistantur, ut tubercula in variis partibus, tusses, spirandi difficultates, ulcera, ophthalmiæ.

Nonnè tot mala ex vesicatoriis erumpentia plus quam sufficiunt ut à variolis absolventibus exulent?

Varia in variolis superveniunt symptomata quæ sigillatim recensere non hic necessum est, & quibus singulis sua propria curatio accommodanda, sed nunquam obliviscendum morbum principem nimis refrigerantia, & horum, diuturniorum usum non admittere.

Hæc sunt medicamenta, hæc est curatoria methodus quibus utendum est in curandâ variolarum inflammatione; si quis verò hanc methodum hæcque remedia cum remediis & methodo in inflammatione communi adhiberi solitis conferat, has methodos à se invicem omninò esse diversas ultro fatebitur.

NON deerunt quibus hucusque allatæ rationes, propositæque curandi methodus non arridebunt. Obijcient novum non esse variolas pro crisi habitas fuisse quâ natura venenum sibi insensum è sanguine expellit. Nec nos ipsi diffitebimur; sed Medici celebriores & nominatim Rhafes hunc morbum inter inflammatorios annumeraverunt, curationemque inflammationi communi idoneam huic attulerunt. Sic totam hanc crîsim totumque ejus effectum in solâ pustularum eruptione reposuisse & inclusisse videntur, ipsamque pustularum inflammationem non pro *inflammatione-crisi*, sed pro inflammatione communi habuerunt. Hoc est quod novum est, quodque accuratè observandum fuisset ut hæc inflammatio semper foveretur & ad suppurationem perduceretur. Sed quid tum adjiciant? Non inde sequitur regimen calidum huic morbo esse oportunum, nam jam olim adhibitum fuit; sed tot tantæque strages edidit ut ætate Sydenhamii relictum fuerit. Nec nos ipsi regimen absolutè calidum stabilire annuimus, sed tantum temperatum, & ætui fovendo, non verò præter modum augendo idoneum. Si tempore Sydenhamii regimen calidum tot tantæque strages edidit, id non evenit quòd regimen calidum ex se malum sit, sed quòd perversè adhibitum fuerit. Est modus, sunt certi fines in rebus, & præsertim in usu medicamentorum. Cæterum hoc regimen calidum non statim post observatas & cognitâs variolas adhibitum fuit, sed regimen refrigerans ab ipso Rhafes edoctum: verò experientiâ rerum magistrâ docente, tam insensum tamque contrarium huic morbo repertum est, ut quasi unanimi consensu deinceps relictum fuerit, & ante Sydenhamium nullum aliud regimen in usu erat quam calidum. Cum tamen hoc ipsum regimen in extremum regimini frigido prorsus oppositum sæpe impingeret, sæpe etiam exitiosum factum est.

In vitium ducit culpæ fuga si caret arte.

Non tam acriter Sydenhamius in calidum hoc regimen insurrexisset si cautius usurpatum fuisset.

Rejiciunt adversarii: hoc responsum nihil solvit, nam innumeri è variolis feliciter evaserunt quibus non aliud regimen quam refrigerans adhibitum fuit. Quid inde? num ex eo quòd omnes qui in periculosos scopulos alliserunt, non perierunt, omnibus feliciter navigare cupientibus in eisdem scopulos erit allidendum? Regimen refrigerans naturæ adversum est, non ducit quòd natura vergit. Sed regimen calidum, si moderatum, naturæ amicum, & alteri cuilibet anteponendum, quòd inceptam crîsim foveat & ad optatum finem perducatur.

Uterius inquierit adversarii: regimen refrigerans huic morbo tam idoneum est ut illud non solum commendaverit Boerhaavius, sed asserere non dubitaverit « perfici debere illam methodum quæ deprehensa est valere in omni morbo » inflammatorio, eo usque ut in hoc morbo impediat ne inflammatio in pus abeat, » cum in aliis omnibus succedat, hicque nihil repugnet, & morbus variolosus » sæpe sit sine variolis ». Sed non attendisse videtur Boerhaavius variolarum eruptionem esse veram & exquisitam crîsim; & crîsim impedire, idem esse ac mortem inferre. Nonne ægotantem occideret quisquis sudoris critici coercendi aut supprimendi causâ venæ-sectionem imperaret; aut frigidam affatim præberet hauriendam? Idem omnino accideret si quis variolarum suppurationem supprimere aggrederetur. Non magis rationi consonum videtur variolarum suppurationem unquam tutò, & absque periculo impediri posse, quam mulieres ætate florentes ab importuno, & tamen critico salutari menstruum fluxu posse unquam immu-

nes reddi sanitate illaesa. Si unquam morbus variolosus fuit absque variolis non inde melius habuerunt aegrotantes, nam aut vitam amiserunt, aut non nisi languidam morbidam & solito breviorē retinuerunt. Aliunde, ut vulgò dicitur, *rara non sunt artis.*

Nec magis admittenda est altera hujusce celeberrimi Medici opinio, quā sperat fore ut aliquando quoddam specificum inveniatur tantæ subtilitatis & vis tam penetrantis, ut venenum variolosum delere possit statim atque sanguini impressum fuerit. Contagium variolosum non solum est subtilis halitus, sed motu & calore vitali pollet dum ab insecto in sanum avolat ut semen in actu venereo emissum. Quānam ergo arte præparari unquam poterit antidotus tam subtilis ut merè halitosa sit & quasi immaterialis, tam vivæ actionis ut contagii variolosi celeritatem & mobilitatem superet, ut tandem ipsamet sit quasi species altera contagii? Quā arte, quibus in vasīs retineri poterit? Quomodo capi, ponderari, applicari? Hæc opinio est fortè pium desiderium, sed præterea nihil.

Ergo tandem inquit & refrigerantia & venæ-sectiones imposterum à curatione variolarum omnino erunt ableganda? minimè. Sed in quibusdam tantum casibus erunt admittenda, non sub titulo regulæ generalis, ut prius factum est, sed tantum exceptionis titulo & cum necessitas postulaverit.

Ergò variolarum inflammatio ab omnibus aliis diversa, quod sit INFLAMMATIO-CRISIS, ac proinde semper fovenda & ad suppurationem perducenda.

DOMINI DOCTORES DISPUTATURI.

M. Guido DANIE DES-PATUREAUX.

M. Henricus-Mich. MISSA, Regii Medicorum Nanceianorum Collegii Socius honorarius, antiquus Regis Exercituum in Germaniâ Medicus ordinarius. Confor Regius, Academiæ Catalaunensis Socius.

M. Ludovicus-Alexander GERVAISE, aëlis Præses.

M. Cleriadus VACHIER.

M. Joannes-Nicolaus MILLIN DE LA COURVEAULT, Anatomes & artis obstetriciæ in gratiam Matronarum Professor.

M. Ambrosius HOSTY.

M. Petrus-Josephus MORISOT DESLANDES.

M. Theophilus DE BORDEU, Eques, Nosocomii Regii & Militaris Barengiensis Medicus designatus.

M. Joannes MAC-MAHON, antiquus Exercituum Regis & Nosocomiorum Militarium Medicus, Regiæ Scholæ Militaris Medicus ordinarius.

Proponebat Parisiis JACOBUS-FRANCISCUS DE VILLIERS, Sam-Maxensis lapud Pictones, Doctor Medicus Pontimusianus, antiquus exercituum Galliæ Regis in Germaniâ Medicus, Saluberrimæ Facultatis Medicinæ Parisiensis Baccalaureus, A. R. S. H. 1771.

A SEXTA AD MERIDIEM.

Typis Quillan, Saluberrimæ Facultatis Medicinæ Typographi 1772.